



David oyant le rapport de la mort de Saül, & de Ionathas, est fort triste, & fait tuer celui qui disoit l'auoir occis.

D AVID retournant de la défaite d'Amalec, demeura deux iours en Siceleg, & au troisieme iour arriua vn ieune homme Amalecite, du camp de Saül, en robe dechirée, & la teste couuerte de poudre, qui dist à Daud, Je suis échappé du camp d'Israël qui est en route, & sont morts Saül & Ionathas son fils : & Daud l'interrogeant, luy dist ; Comment sçais-tu qu'ils sont morts ? Et l'adolescent luy dist, Je suis venu d'adventure sur la montagne de Gelboé ; où Saül estoit fort navré, appuyé sur sa lance, & voyant les cheuaucheurs qui s'approchoient de luy, & craignant de tomber vif en leurs mains, il m'appella, & ayant mis la pointe de son épée contre sa poitrine, me dist ; Mets-toy sur moy, & me tuë : car ie suis en grand' angoisse : & lors ie le tuay, car ie sçauois bien qu'il ne pouuoit échapper de la mort. Adonc luy mort, ie pris son diadème avec ses brasselets d'or, & les ay icy apportez. Et Daud de dueil déchira ses vestemens, & tous ses hommes pleurerent iusques au vespre sur Saül, & Ionathas. Et Daud fit grande complainte de leur mort, loüant leur vertu, dextérité, hardiesse, beauté & bonne grace : Puis Daud dist au iouuenceau, Pourquoi n'as-tu point craint de mettre la main sur l'oingt du Seigneur ? & le fit occire, luy disant, Ton sang soit sur ta teste, car ta bouche a parlé contre toy, & porté témoignage de ton iniquité. *2. Des Roys Chap. 1.*